



Fundasaun Mahein (FM), 13 Juñu 2017

## Komunikadu Imprensa

### Polêmika Uzu Forsa no Kilat husi Forsa Seguransa

*“Iha Âmbitu Lei N.º 5/2017 de 19 de Abril Regime Jurídico Relativo à Prática de Arte Marciais, Rituais, Armas Brancas, Rama Ambon e Quinta Alteração ao Código Penal”*

Problema sira liga ho arte marsiais, rituais, arma branka no rama ambon durante ne'e sai hanesan preokupasaun husi públiku tomak Timor-Leste. Iha ne'ebé Rezolusaun Governu N.º 16/2013 *Extinção de Grupos de Artes Marciais*, taka total atividade sira arte marsiais ne'ebé identifikadu ho violentu. Maibe kontinua organiza malu, halo rekrutamentu no treinamentu ho suba-subar iha comunidade nia leet no ironiku liu-tan violênsia no krime sira liga ho arte marsiais aumenta maka'as liu-tan iha tinan sira ikus ne'e. Suspeitu ba kazu sira liga ho arte marsiais no rama ambon, autoridade seguransa ka Polícia Nacional Timor-Leste (PNTL) kaptura bebeik ona maibe barak husi suspeitu sira ne'e hetan livre tamba la iha lei espesifiku ruma kriminaliza kona-bá prátika ilísita arte marsiais no rituais, uzu arma branka no rama ambon hodi halo krime. Tamba ne'e Fundasaun Mahein (FM) apresia tebes ho kriaun lei ida ne'e nian hodi regulariza no kriminaliza exersisiu ka treinamentu arte marsiais iha ne'ebé la tuir lei nia haruka ka nia bandu. Nune'e mos útilizasaun ba arma branka no rama ambon hodi prátika krime.

Nune'e Parlamentu Nasional aprova iha loron 6 Marsu 2017 no Prezidente Repúblika promulga iha 12 Abril 2017, *Lei N.º 5/2017 de 19 de Abril Regime Jurídico Relativo à Prática de Arte Marciais, Rituais, Armas Brancas, Rama Ambon e Quinta Alteração ao Código Penal*. Lei ne'e rasik hafoin públika no la ho sosializasaun ne'ebé diak ba povu maibe alerta maka'as liu iha atuasaun sira ne'ebé sei halo, husi ulun boot autoridade seguransa nian. Ikus mai, Lei ne'e rasik sai mos polêmika iha públiku kona-bá uzu forsa no kilat “tiru no oho” husi forsa seguransa bainhira implementa lei ne'e.

Ulun boot sira seguransa nian hato'o katak implementasaun ba lei ida ne'e, sei hola medida saida deit hafoin bele ko'alia kona-bá direitu umanus. FM fiar katak Lei ne'e rasik salva direitu ema nian ka direitu umanus. Portantu ita hotu la aseita ho violênsia sira ne'ebé husi arte marsiais no rituais, no utiliza arma branka no rama ambon hodi prátika krime. Iha ne'ebé sai hanesan ameasa no halo ema mate, kanek, no halo ema tauk la'o iha fatin sira ne'ebé identifikadu ho violênsia husi arte marsiais ne'ebé ass no fatin sira ne'ebé bain-bain mosu asaltu deskuiñesidu ho arma branka no rama ambon. Nune'e forsa seguransa tenke hola medida saida deit tuir lei nia haruka inklui uza forsa no kilat “tiru no oho”.

Maibe, forsa no kilat ne'ebé uza tenke respeita prinsipiu nesiedade no proporsionalidade ne'ebé adopta iha lei no konvensaun ka tratadu sira ne'ebé Timor-Leste ratifika ka hola parte ba. La signifika katak forsa seguransa labele uza forsa no

kilat ka “tiru no oho”. Forsa no kilat uza bainhira bele justifika ho sikuntansia uza nian, iha ne’ebé bainhira maka bele uza no oinsa bele uza. Nune’e bainhira uza forsa no kilat, la’os uza deit nune’e, iha mos ninia responsabilidade tantu disiplinár, sivil no kriminal.

Tamba ne’e FM husu ba ajente seguransa nian tomak katak bainhira ezejuta Lei ne’e tenke ho kuidadu no respeita ba lei sira. Nune’e mos labele kunfundi ho orden no instrusaun sira ne’ebé ita boot sira nia komandante fo, “sim ita boot sira tenke kumpri no ezejuta”, orden haruka bele uza forsa no kilat “tiru no oho” maibe sirkuntansia maka bele justifika no uza tuir prinsipiu nesetidade no proporsionalidade. Portantu bainhira ajente ida prátika no ka simu orden husi nia komandante prátika krime ne’ebé la tuir lei no rejime uza forsa no kilat nian, sei kriminaliza ajente no nia komandante tuir Kodigu Prosesu Penal Timor-Leste nian. Ho lian seluk hatete nune’e “bainhira uza forsa no kilat ‘tiru no oho’ tuir lei, – lei sei proteje o no bainhira uza la tuir lei – lei ne’e rasik maka sei kondena o”.

### **Rekomendasau**

1. Rekomenda ba autoridade setor justisa no seguransa nian presiza sosializa lei ne’e kle’an ba públiku ka comunidade sira antes implementa.
2. Rekomenda ba Komandu Jeral PNTL no Komandu Munisipal presiza sosializa kle’an ba membru instituisaun ne’e nian hodi intende diak kontiudu husi lei ne’e rasik liu-liu kona-bá uzu forsa no kilat.
3. Ajente forsa seguransa no forsa militar iha atuasaun kazu sira ne’ebé relasiona ho uza forsa no kilat tenke komprimenta ba lei no rejime sira ne’ebé regula kona-bá uza forsa no kilat.

Atu hetan informasaun kle’an liu kona-bá asuntu ne’e bele kontaktu:

### **Nélson Belo**

Diretor Ezekutivu

Email: [direktor.mahein@gmail.com](mailto:direktor.mahein@gmail.com)

Telemovel: (+670) 78316075 ka 77561184

Website: [www.fundasaunmahein.org](http://www.fundasaunmahein.org)